

**ADDENDA AO CONVENIO DE COLABORACIÓN ENTRE A CONSELLERÍA DE EMPREGO, COMERCIO E EMIGRACIÓN E A HERMANDAD GALLEGA DE VENEZUELA PARA O MANTENIMENTO DUNHA OFICINA DE INFORMACIÓN E ASESORAMENTO E ATENCIÓN DE NECESIDADES SOCIO ASISTENCIAIS E SANITARIAS BÁSICAS DA CIDADANÍA GALEGA RESIDENTE EN CARACAS, VENEZUELA**

Santiago de Compostela, 7 de outubro de 2025

**REUNIDOS**

Por una banda, José González Vázquez, conselleiro de Emprego, Comercio e Emigración, (en virtude do nomeamento efectuado polo Decreto 44/2024, do 14 de abril), en nome e representación da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa presidencia.

E pola outra, Jesús Alberto Bello Couselo, presidente da Hermandad Gallega de Venezuela, segundo consta na acta de eleccións da entidade do 27 de xuño de 2025, actuando no seu nome e representación.

As partes comparecentes recoñécense mutuamente plena lexitimación, capacidade e representación, para a sinatura da presente addenda e, para estes efectos,

**EXPOÑEN**

**Primeiro.** A Consellería de Emprego, Comercio e Emigración é o departamento da Xunta de Galicia ao que lle corresponde, entre outras, a competencia das relacións e o apoio as persoas e ás comunidades galegas do exterior, así como o fomento e a promoción da súa actividade e funcionamento, tal e como se recolle no artigo 1.c) do Decreto 147/2024, do 20 de maio, polo que se establece a súa estrutura orgánica.

seu artigo 49 establece que a Secretaría Xeral da Emigración é o órgano superior da Administración xeral da Comunidade Autónoma de Galicia, no ámbito da emigración e do retorno, ao que lle corresponden, entre outras, as competencias recollidas na Lei 7/2013, do 13 de xuño, da galegitude; en particular, son competencias desta secretaría xeral as relacións coas comunidades galegas no exterior, así como o fomento e a promoción da súa actividade e funcionamento.

**Segundo.** O 7 de abril de 2025, a Consellería de Emprego, Comercio e Emigración asinou un convenio de colaboración coa Hermandad Gallega de Venezuela.

Na cláusula primeira do convenio sinálase que o seu obxecto é establecer o marco da colaboración entre as entidades asinantes para o mantemento dunha oficina de información e asesoramento social e ademais colaborar na difusión e xestión dos programas e actividades que desenvolve anualmente a Secretaría Xeral da Emigración, especialmente os de carácter socio- asistencial.

**Terceiro.** A Hermandad Gallega de Venezuela é a entidade galega de referencia no país caribeño, que agrupa actualmente a máis de vinte e tres mil socias e socios emigrantes galegos e a súa descendencia, colectivo potencialmente susceptible de ser beneficiario dos programas e das actividades que executa a Secretaría Xeral da Emigración coa que está colaborando activamente.



O 3 de abril de 2007, ao abeiro do convenio de colaboración asinado entre a Secretaría Xeral da Emigración e a Hermandad Gallega de Venezuela, creouse unha oficina de información e asesoramento, a través da que se está a desenvolver unha labor de difusión, asesoramento, información e colaboración na xestión das solicitudes dos programas e actividades que executa a Secretaría Xeral da Emigración, cun incremento moi importante da actividade debido á situación que está vivindo o país.

Por outra banda, a Hermandad Gallega de Venezuela está a desenvolver unha importante política social, asistencial e sanitaria orientada a facer efectiva a cobertura médica básica de persoas con escasos recursos e que se atopan en situación de necesidade pertencentes á colectividade galega, tendo en conta que un gran número de persoas deste colectivo non dispón da pensión económica de anciandade que concede o Estado español, e os seus recursos non posibilitan a cobertura de tales necesidades. A propia entidade dispón de servizos básicos de asistencia social, de ambulatorio médico e atención sanitaria básica

**Cuarto.** Na cláusula cuarta do convenio establécese unha achega económica por un importe de sesenta mil euros (60.000 €) con cargo á aplicación orzamentaria 14.05.312C.481.0, código de proxecto 2015 00039, dos orzamentos xerais da Comunidade Autónoma de Galicia para o ano 2025.

Na cláusula terceira, obrigas das partes, a Hermandad Gallega de Venezuela comprométese a prestar os servizos obxecto do convenio nos termos establecidos nel e informar periodicamente á Secretaría Xeral da Emigración dos resultados desta iniciativa.

Debido á situación social, política e económica pola que está a atravesar o país e sobre todo o aumento do custo dos gastos de funcionamento da oficina derivados desta situación, a Hermandad Gallega de Venezuela ten graves dificultades coa financiación prevista inicialmente neste ano para o mantemento da oficina de información e asesoramento, polo que, co fin de seguir prestando a atención necesaria ás persoas galegas que residen alí, é preciso incrementar o importe da achega en 20.000€.

As partes, actuando no exercicio do seu cargo e representación,

#### ACORDAN

**Cláusula primeira.** Incrementar en 20.000 € a achega da Consellería de Emprego, Comercio e Emigración prevista na cláusula cuarta, que queda redactada do seguinte xeito no primeiro parágrafo:

"Co obxecto de colaborar no financiamento das accións recollidas neste convenio, a Consellería de Emprego, Comercio e Emigración comprométese a achegar unha contía de oitenta mil euros (80.000€) con cargo á aplicación orzamentaria 14.05.312C.481.0, código de proxecto 2015 00039, dos orzamentos xerais da Comunidade Autónoma de Galicia para o ano 2025"

**Cláusula segunda.** Modificar o prazo de xustificación e o de vixencia recollidos na cláusula oitava parágrafo primeiro, que queda redactada do seguinte xeito:

"A data limite para presentar a documentación xustificativa será o 10 de decembro de 2025"





XUNTA  
DE GALICIA

e na cláusula décimo sexta, que queda redactada do seguinte xeito no parágrafo primeiro:

"Este convenio entrará en vigor o día seguinte ao da súa sinatura e estenderá a súa vixencia ata o 31 de decembro de 2025, agás que sexa denunciado por algunha das partes por incumprimento dos acordos que nel se recollen".

En proba de conformidade con canto antecede, asinan dous exemplares, no lugar e data sinalados no encabezamento.

O conselleiro de Emprego, Comercio e  
Emigración



O presidente da Hermandad Gallega  
de Venezuela

Jesús Alberto Bello Couselo

